

Халқ депутатлари Бувайда туман кенгашининг навбатдан ташқари сессияси тўғрисида ахборот

Халқ депутатлари Бувайда туман Кенгашининг навбатдан ташқари сессияси бўлиб ўтди.

Унда вилоят ҳокими, Ўзбекистон Республикаси Олий Мажлиси Сенати аъзоси Шуҳрат Фаниев иштирок этиб, туманда ижтимоий-иқтисодий ислоҳотларнинг амалга оширилиши, бу борада эришилаётган ютуқ ва натижалар хусусида маъруза қилди.

Таъкидланганидек, туманда 2017 йилда саноатни ривожлантириш дастури бўйича 29 та, хизмат кўрсатиш ва сервис соҳасида 32 та, қишлоқ хўжалиги ва озиқ-овқат маҳсулотлари ишлаб чиқариш тармоқларида 34 та лойиҳалар амалга оширилиб, 1000 га яқин янги иш ўринлари яратилди. Ижтимоий соҳани ривожлантириш бўйича 2017 йилги Инвестиция дастурига асосан 3 та мактабгача таълим муассасаси қурилиши ва таъмирланиши ишлари олиб борилди. 18 та умумий ўрта таълим мактаби, 11 та мактабгача таълим муассасаси жорий таъмирланди. Шунингдек, 23 та қишлоқ врачлик пункти негизида 8 та қишлоқ оиласвий поликлиникаси ва 2 та ҚВП негизида тез ёрдам шоҳобчаси, 7 та ҚВП ўрнида шифокорлар хизмат уйлари ташкил этилди. Электр таъминоти, ичимлик суви, замонавий ахборот-коммуникация тармоқларини яхшилаш, ички йўлларни таъмирлаш борасида кенг кўламли ишлар олиб борилди. 2017 йилда 720 млн. сўм маблағ ҳисобига 33 км.дан газ тармоғи тортиб келиниб, 34 та кўп қаватли уйлар ҳамда саноат корхоналарига тўлиқ етказиб берилди.

Ўтган йили туманда фаолият кўрсатаётган фермер хўжаликлари давлатга дон етказиб бериш режасини 114,1 фоизга, пахта топшириш шартнома режасини 101 фоизга бажариб, вилоятимиз миқёсида яхши натижага эришганликлари эътиборга сазовордир.

Сессияда вилоят ҳокими томонидан туман фермерларининг бу каби ютуқлари алоҳида эътироф этилди ва жорий йилда ҳам нафақат қишлоқ хўжалиги, балки барча соҳаларда ютуқлар бардавом бўлишига юксак ишонч билдирилди.

Алибек Турсунов бошқа ишга ўтганлиги сабабли уни эгаллаб турган лавозимидан озод этиш, айни пайтда Бағдод тумани ҳокимининг биринчи ўринbosари лавозимида ишлаётган Бехзод Ибрагимовни Бувайда тумани ҳокими этиб тайинлаш тўғрисида вилоят ҳокимининг қарорлари халқ депутатлари Бувайда туман Кенгаши депутатлари томонидан бир овоздан маъқулланди.

Сессияда туман фаоллари томонидан энг муҳим масалалар юзасидан фикр-мулоҳазалар билдирилиб, галдаги устувор вазифалар белгилаб олинди.

Ботир МАДИЁРОВ.

2018-02-08 17:00:00